

**ՀԱՄԱԳՈՐԾԱԿՑՈՒԹՅԱՆ ՀՈՒՇԱԳԻՐ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ ՈՍՏԻԿԱՆՈՒԹՅԱՆ  
ԵՎ ԱՄԵՐԻԿԱՅԻ ՄԻԱՑՅԱԼ ՆԱՀԱՆԳՆԵՐԻ  
ԱՐԴԱՐԱԴԱՏՈՒԹՅԱՆ ԴԵՊԱՐՏԱՄԵՆՏԻ  
ԹՄՐԱՄԻՋՈՑՆԵՐԻ ԴԵՄ ՊԱՅՔԱՐԻ ՎԱՐՉՈՒԹՅԱՆ ՄԻՋԵՎ**

Հայաստանի Հանրապետության ներքին գործերի նախարարության ոստիկանության և Ամերիկայի Միացյալ Նահանգների արդարադատության դեպարտամենտի թմրամիջոցների դեմ պայքարի վարչությունը, այսուհետ՝ Մասնակիցներ,

վերահաստատելով իրենց հավատարմությունը փոխշահավետ և արդարության վրա հիմնված համագործակցության սկզբունքներին,

առաջնորդվելով թմրամիջոցների, հոգեմետ նյութերի (այսուհետ՝ թմրամիջոցներ), ինչպես նաև դրանց անալոգների և պրեկուրսորների ապօրինի շրջանառության դեմ պայքարի փոխադարձ շահով, խստորեն պահպանելով Մասնակիցների պետությունների ինքնիշխանությունն ու ներքին գործերին չմիջամտելու սկզբունքը,

գիտակցելով, որ թմրամիջոցների, դրանց անալոգների ու պրեկուրսորների ապօրինի շրջանառությունը դրանց չարաշահման հետ մեկտեղ լուրջ սպառնալիք են ներկայացնում Մասնակիցների պետությունների բնակչության առողջության և բարեկեցության համար,

ճանաչելով անդրազգային հանցագործությունների, այդ թվում՝ որոշ դեպքերում թմրամիջոցների շրջանառության և ահաբեկչության միջև սերտ կապերի առկայությունը,

հայտնելով իրենց պատրաստակամությունը՝ համագործակցելու միջազգային իրավունքի՝ համընդհանուր ճանաչում ունեցող սկզբունքներին և նորմերին համապատասխան,

Մասնակիցներից յուրաքանչյուրը, գործելով իր ազգային օրենսդրության

համաձայն և իր լիազորությունների սահմաններում, կձգտի համագործակցել հետևյալ եղանակով.

## **Հոդված 1**

### **Նպատակը**

Սույն համագործակցության հուշագրի (այսուհետ՝ Հուշագիր) Մասնակիցները, գործելով իրենց իրավասության շրջանակներում և իրենց երկրների ազգային օրենսդրությանը և միջազգային պարտավորություններին համապատասխան, կձգտեն համագործակցել թմրամիջոցների, դրանց անալոգների և պրեկուրսորների ապօրինի շրջանառության, ինչպես նաև այդ հանցավոր գործունեությունից բխող՝ փողերի լվացման հետ կապված իրավախախտումների դեմ պայքարում:

Ոլորտային համագործակցության վերաբերյալ սույն ոչ պարտադիր Հուշագիրը նպատակաուղղված չէ հակասելու բազմակողմ պայմանագրերի փոխադարձ իրավական օգնության դրույթներին փոխադարձ իրավական օգնության այն դրույթներով, որի կողմերն են թե՛ Հայաստանի Հանրապետությունը, թե՛ Ամերիկայի Միացյալ Նահանգները:

## **Հոդված 2**

### **Համագործակցությունը**

Սույն Հուշագրի իրականացման նպատակով Մասնակիցները մտադիր են համագործակցել հետևյալ ոլորտներում.

1) օպերատիվ տեղեկությունների փոխանակում և փոխադարձ հետաքրքրություն ներկայացնող տեղեկությունների վերլուծություն սույն Հուշագրի 1-ին հոդվածում քննարկված համագործակցության շրջանակներում,

2) ներգրավվածություն ապօրինի թմրամիջոցների, դրանց անալոգների և պրեկուրսորների՝ միջազգային ուղիներով շարժը նվազեցնելուն ուղղված երկկողմ

գործողություններին (օպերացիաներին), այդ թվում՝ անհրաժեշտության դեպքում՝ մասնակցություն միջազգային վերահսկվող առաքումներին,

3) թմրամիջոցների ապօրինի շրջանառության հետ կապված իրավախախտումների քննությանն ու քրեական հետապնդմանն առնչվող ազգային օրենքների և օրենսդրության, ինչպես նաև դրանց փոխոխությունների և լրացումների վերաբերյալ տեղեկությունների մասին միմյանց իրազեկում,

4) անհրաժեշտության դեպքում՝ վերլուծական կամ քննչական նպատակներով անհրաժեշտ քանակությամբ նյութերի տրամադրում<sup>1</sup>,

5) փոխադարձ համագործակցությունն ամրապնդելու նպատակով աջակցության տրամադրում՝ թմրամիջոցների, դրանց անալոգների և պրեկուրսոր քիմիական նյութերի շրջանառության հետ կապված փողերի ապօրինի հոսքը կանխելու և դրան հակազդելու նպատակով,

6) մասնակցություն պաշտոնական և ոչ պաշտոնական հանդիպումներին, համաժողովներին, վերապատրաստմանը և անձնակազմի մասնագիտական զարգացմանն ուղղված այլ միջոցառումների,

7) միջազգային համագործակցության խթանում ՆՀՆ-ի (նոր հոգեակտիվ նյութեր) և ամֆետամին տիպի խթանիչների, այդ թվում՝ մեթամֆետամինի հետ կապված հարցերի շուրջ քայլերի ուղղությամբ,

8) սույն Հուշագրին համապատասխան համագործակցության նոր ուղիների մշակում կամ լրացուցիչ պայմանավորվածությունների ձեռքբերում:

---

<sup>1</sup> Ինչպես սահմանված է «Թմրամիջոցների և հոգեմետ նյութերի ապօրինի շրջանառության դեմ պայքարի մասին» ՄԱԿ-ի կոնվենցիայով, 1988թ., հոդված 9:

### **Հոդված 3**

#### **Համագործակցության զարգացումը**

Մասնակիցներն ակնկալում են, որ սույն Հուշագիրը նրանց չի պարտավորեցնում զերծ մնալ փոխադարձաբար ընդունելի այլ գործունեության մեջ, ինչպես նաև սույն Հուշագրի 1-ին հոդվածին համապատասխան համագործակցությանը ներգրավվելուց:

### **Հոդված 4**

#### **Տեղեկությունների փոխանակումը**

Սույն Հուշագրի շրջանակներում տեղեկությունների փոխանակումը ներառում է, սակայն չսահմանափակվելով դրանով, հետևյալի մասին տեղեկությունները.

1) թմրամիջոցների ապօրինի շրջանառության համար թմրամիջոցների, դրանց անալոզների և պրեկուրսորների մատակարարման աղբյուրներ և դրանց տարածումը դադարեցնելու նպատակով կիրառվող մեթոդներ,

2) թմրամիջոցների առևտրով զբաղվող անձանց կողմից թմրամիջոցները տրանսպորտային միջոցներում թաքցնելու եղանակներ, ինչպես նաև իրավապահ մարմինների կողմից հայտնաբերման մեթոդներ,

3) այլ երկրների տարածքից դեպի Հայաստանի Հանրապետության տարածք թմրամիջոցների, դրանց անալոզների և պրեկուրսորների ապօրինի տեղաշարժի կամ դրանց ապօրինի տեղաշարժի մասով պլանների հետ կապված հատուկ փաստեր և քննություններ,

4) թմրամիջոցների, դրանց անալոզների և պրեկուրսորների ապօրինի շրջանառության, այդպիսի գործունեության արդյունքում ստացված եկամուտների օրինականացման վերաբերյալ փաստեր, միջադեպեր և հանգամանքներ,

5) թմրամիջոցների, դրանց անալոզների և պրեկուրսորների փոխադրման

ուղիներ,

6) թմրամիջոցների, դրանց անալոգների և պրեկուրսորների նոր տեսակներ,

7) թմրամիջոցների, դրանց անալոգների և պրեկուրսորների ապօրինի շրջանառության արդյունքում ստացված եկամուտների օրինականացման եղանակներ ու մեթոդներ,

8) ապօրինի նյութերի տեսակներ, դրանց արտադրության տեխնոլոգիաներ և ապօրինի շրջանառության մեջ դրանց օգտագործման նոր մեթոդներ, այդ թվում՝ համակարգչային տեխնոլոգիաների և համացանցի միջոցով կատարված՝ թմրամիջոցների հետ կապված հանցագործություններ,

9) փոխադարձ հետաքրքրություն ներկայացնող այլ հարցեր:

10) Սույն Հուշագրի համագործակցության շրջանակներում անձնական տվյալների փոխանակում չի նախատեսվում:

## **Հոդված 5**

### **Աջակցություն ցուցաբերելու մասին հարցումը**

Մասնակիցները մտադիր են սույն Հուշագրի մասով համագործակցել՝ հիմնվելով Մասնակցի կողմից աջակցություն ցուցաբերելու մասին հարցման կամ այն Մասնակցի նախաձեռնության վրա, որը ենթադրում է, որ այդպիսի աջակցությունը բխում է մյուս Մասնակցի շահերից:

Աջակցություն ցուցաբերելու մասին հարցումները սովորաբար ներկայացվում են գրավոր: Հրատապ դեպքերում հարցումները կարող են փոխանցվել բանավոր, սակայն ակնկալվում է դրանց գրավոր հաստատումը, այդ թվում՝ էլեկտրոնային փոստով կամ նմանատիպ էլեկտրոնային եղանակներով:

Հարցման հուսալիության կամ բովանդակության վերաբերյալ որևէ կասկածի դեպքում կարող է պահանջվել լրացուցիչ հաստատում:

Ակնկալվում է, որ աջակցություն ցուցաբերելու մասին հարցումը պետք է պարունակի՝

- 1) պաշտոնատար անձի պաշտոնը, աջակցություն ստանալու վերաբերյալ հարցում կատարած Մասնակցի անվանումը,
- 2) հարցման էության ներկայացումը,
- 3) հարցման նպատակի և հիմնավորման վերաբերյալ նշումը,
- 4) հայցվող աջակցության բովանդակության նկարագրությունը,
- 5) ցանկացած այլ տեղեկություն, որը կարող է օգտակար լինել հարցման պատշաճ կատարումն ապահովելու համար:

Մասնակիցները նախատեսում են ժամանակին բավարարել մյուս Մասնակցի հարցումները: Ակնկալվում է, որ հարցմանը պատասխանելու համար նախատեսված ողջամիտ ժամկետը չպետք է գերազանցի 30 օրը, եթե հարցման մեջ այլ ժամկետ նշված չէ:

Եթե աջակցություն ցուցաբերելու մասին հարցումը հնարավոր չէ կատարել կամ ժամանակին կատարել, ապա հարցումն ստացող Մասնակիցը պետք է ձգտի մյուս Մասնակցին անհապաղ տեղեկացնել մերժման կամ հետաձգման պատճառների ու հարցումը կատարելու ակնկալվող ժամկետի վերաբերյալ:

Կողմերից յուրաքանչյուրը սույն Հուշագրի 6-րդ հոդվածին համապատասխան կարող է մասամբ կամ ամբողջությամբ մերժել հարցման կատարումը:

Սույն Հուշագրով չի նախատեսվում ընդգրկել կամ անդրադառնալ անձանց հանձնման կամ քրեական գործերով պաշտոնապես փոխադարձ իրավական օգնություն տրամադրելու հարցերին, այդ թվում՝ այնպիսի դեպքերում, երբ համապատասխան մարմիններն ուղղակիորեն լիազորել են այդպիսի օգնության տրամադրումը:

## **Հոդված 6**

### **Աջակցության տրամադրումը մերժելը**

Մասնակիցներն ընդունում են, որ Մասնակիցներից յուրաքանչյուրը կարող է մասամբ կամ ամբողջությամբ հրաժարվել սույն Հուշագրում քննարկված գործողությունները կատարելուց կամ սահմանափակել կատարումը որոշակի պայմանների առկայության դեպքում, եթե կարծում է, որ համագործակցությունը կարող է բացասաբար անդրադառնալ իր պետության անվտանգության կամ շահերի վրա, հակասել ազգային օրենսդրությանը կամ միջազգային պարտավորություններին, կամ եթե այն խախտում է մարդու իրավունքները, կամ իր կողմից պատշաճ համարվող ցանկացած այլ պատճառով:

Մասնակիցը, որը հրաժարվում է իրականացնել սույն Հուշագրով նախատեսված գործողությունները, պետք է հնարավորինս շուտ գրավոր ծանուցի մյուս Մասնակցին այդպիսի մերժման պատճառների մասին:

## **Հոդված 7**

### **Ստացված տեղեկությունների և փաստաթղթերի սահմանափակ օգտագործումը**

Մասնակիցները նախատեսում են պահպանել սույն Հուշագրով ստացված տեղեկությունների գաղտնիությունը:

Մասնակիցները պարտավորվում են սույն Հուշագրի հիման վրա ստացված տեղեկությունները, իրեն ու փաստաթղթերը չօգտագործել այլ նպատակներով, քան նախատեսված է նախնական հարցմամբ, ինչպես նաև պարտավորվում են չփոխանցել այդպիսի տեղեկությունները, իրեն ու փաստաթղթերը երրորդ կողմի՝ առանց այն Մասնակցի նախնական գրավոր համաձայնության, որը տրամադրել է այդ տեղեկությունը, իրը կամ փաստաթղթերը:

Մասնակիցները կարող են իրականացնել տեղեկությունների, նյութերի և իրենց համապատասխան տվյալների բազաներում առկա տեղեկությունների փոխանակում:

Անհրաժեշտության դեպքում Մասնակիցները կարող են նաև փոխադարձաբար համաձայնեցված որոշում կայացնել երկկողմանիորեն

իրականացվող օպերատիվ և քննչական բնույթի տեղեկատվական գործողությունների հետ կապված տեղեկությունների կամ նյութերի օգտագործման հատուկ պայմանների և կանոնների վերաբերյալ:

## **Հոդված 8**

### **Համագործակցության համակարգումը և լեզուն**

Սույն Հուշագիրն իրականացնելու նպատակով նախատեսվում է, որ Մասնակիցները պետք է միմյանց տեղեկություններ տրամադրեն համագործակցության համակարգման համար պատասխանատու ստորաբաժանումների կամ անձանց մասին և անմիջապես միմյանց ծանուցեն նրանց անունների, իրավասությունների ու կոնտակտային տվյալների ցանկացած փոփոխության վերաբերյալ:

Սույն Հուշագրով նախատեսված համագործակցության շրջանակներում կարող են օգտագործվել անգլերենը և հայերենը, եթե մասնակիցների կողմից առանձին դեպքերի մասով այլ բան նշված չէ:

## **Հոդված 9**

### **Հրապարակումը**

ԱՄՆ-ի՝ «Տեղեկատվության ազատության մասին» 5 U.S.C. 552 ակտին համապատասխան՝ Միացյալ Նահանգներում սույն Հուշագիրը ենթակա չէ հրապարակման:

## **Հոդված 10**

### **Ծախսերը**

Ակնկալվում է, որ Մասնակիցներից յուրաքանչյուրը պատասխանատու է սույն Հուշագրի իրագործման հետ կապված իր ծախսերի համար՝ Մասնակցի համար տվյալ երկրի ազգային օրենսդրությամբ հատկացված ֆինանսական միջոցների շրջանակներում, եթե Մասնակիցների կողմից առանձին դեպքերի մասով որոշակի հարցերի շուրջ այլ բան չի որոշվել:

## **Հոդված 11**

### **Վեճերի լուծումը**

Մասնակիցներն ակնկալում են սույն Հուշագրի դրույթների մեկնաբանման կամ կիրառման առնչությամբ իրենց միջև ծագած ցանկացած վեճ լուծել խորհրդակցության և քննարկման միջոցով:

## **Հոդված 12**

### **Փոփոխությունները**

Սույն Հուշագրում կարող են փոփոխություններ կատարվել Մասնակիցների փոխադարձ գրավոր համաձայնությամբ:

## **Հոդված 13**

### **Միջազգային համաձայնագրերի հետ կապը**

Ոլորտային համագործակցություն կարգավորող սույն Հուշագիրը միջազգային պայմանագիր չէ և իրավաբանորեն պարտադիր բնույթ չի կրում և նախատեսված չէ ազդելու Մասնակիցների՝ միջազգային այլ համաձայնագրերից բխող իրավունքների կամ պարտավորությունների վրա, ինչպես նաև չի հակասում փոխադարձ իրավական օգնություն ցուցաբերելու դրույթների վերաբերյալ բազմակողմ պայմանագրերին, որոնց կողմ են ինչպես Հայաստանի Հանրապետությունը, այնպես էլ Ամերիկայի Միացյալ Նահանգները:

## **Հոդված 14**

### **Սույն Հուշագրի սկիզբը և դադարեցումը**


Սույն Հուշագիրն ուժի մեջ է մտնում երկու Մասնակիցների լիազոր ներկայացուցիչների կողմից վերջին ստորագրման պահից և գործում է անորոշ ժամկետով:

Նախատեսվում է, որ այն Մասնակիցը, որը ցանկանում է սույն Հուշագրին համապատասխան դադարեցնել իր մասնակցությունը, պետք է 30 օր առաջ իր մտադրության մասին մյուս Մասնակցին ներկայացնի գրավոր ծանուցում:

Ստորագրված է երկու օրինակից՝ հայերեն և անգլերեն, 2024 թվականի մայիսի 24-ին, Երևանում:

**Հայաստանի Հանրապետության  
ներքին գործերի նախարարության  
ոստիկանության կողմից՝**

Հայաստանի Հանրապետության ներքին  
գործերի նախարարության  
ոստիկանության պետ – ներքին գործերի  
նախարարի տեղակալ  
Արամ Հովհաննիսյան



**Ամերիկայի Միացյալ Նահանգների  
արդարադատության դեպարտամենտի  
թմրամիջոցների դեմ պայքարի  
վարչության կողմից՝**

Հատուկ գործակալի  
պարտականությունները կատարող  
Մերձավոր Արևելքի բաժնի  
պատասխանատու  
Քրիստոֆեր Ա. Դիջիք

